



TERZA SESSIONE STRAORDINARIA DI U 2017

29 È 30 GHJUGNU

N° 2017/E3/036

**RISPOSTA DI Mma Agnès SIMONPIETRI, Cunsigliera Esecutiva di Corsica
A A DUMANDA A BOCCA POSTA DA Mma Nadine NIVAGGIONI
À U NOME DI U GRUPPU « FEMU A CORSICA »**

OGETTU: XYLELLA : A VERITÀ PIATTATA ?

Signora cunsigliere

Tocca à custattà ch'è vo avete a raghjone, in l'affare di a Xylella si pò disgraziatamente affirme ch'è no ci n'andemu da Caccia à Niolu è ch'ella hè stata tinuta piatta a virità.

Infatti, trè infurmazione di gran primura sò state trascurate à oziu da i servizii di u Statu chì, a ramentu quì, tene ellu a cumpitenza in materia sanitaria vigitabile.

- 1) Un casu di a sottuspezia « pauca » hè statu scupartu in Corsica in lu 2016 nantu à una leccia : hè statu publicatu di ghjinnaghju scorsu da u labburatoriu di ricerca di l'INRA d'Angers chì l'hà idintificatu. Cirtezza ùn ci ne sarà mai nantu à u stirporiu di stu casu di « pauca », listessa o nò à quella di a Puglia taliana, datu ch'ella hè morta a leccia.

U pinseri maiò vene da u fattu chì stu casu ùn hè sicuramente sulignu è chì, sinu ad avà, a leccia ùn era conta in lu listinu di e piante sinsibbule à a Xylella « pauca ».

- 2) Cù una siconda infurmazione capitale listessi servizii anu fattu à piatti piattò apposta : certi alivi di e Baliare sò malati par via di a sottuspezia multiplex, chì dicianu appuntu chì, à l'alivi, ùn li si pudia appiglià. Ramentu chì sta sottuspezia di u batteriu hè quella chì ghjè largamente sparta in Corsica.
- 3) Hè stata trasmessa una alerta da a Spagna à l'Auropa di marzu scorsu : a Spagna hà fattu sapè à l'EFSA (Agenzia sanitaria aurupea) chì certe piantine cuntaminate eranu isciute da l'Andalusia à via di l'Auropa sana ; certe sò state ritrove ancu in Cecchia. Ùn solu st'alerta ùn hà cagiunatu nisuna ricerca di i lotti cuncirnati ma di sta infurmazione nè si n'hè intesu un zittu nè ci si n'hà cacciatu una dicisione in materia d'analisi di u risicu pè u parmessu d'impurtazione di piantine.

A nìgazione di ste infurmazione da u Statu hà parmessu à i so servizii di francassila d'una mudifica di l'analisi di i risichi ligati à l'origine di e piantine impurtate (sò solu difese d'entre e piantine d'Italia) è di cuntinivà à attribbuì parmessi d'impurtazione di piantine ghjunte da a Spagna ; par via di derugazione accurdate di modu massicciu da mesi è mesi, cumpresuci e spezie più arrisicate, tal'è l'alivu, u loru ecc... ancu puru quandu ch'è e piantine sò prudutte sopra à locu !

Fatta fine ch'è scadutu l'arristatu di difesa d'impurtazione di e piantine pigliatu di maghju di u 2015.

Di modu stupendu, u Statu a li dura à cunsidarà ch'è a Spagna ùn hè micca una nazione à risicu !

Mai ci semu piantati di dinunzià sta situazione cù u prifettu di Corsica.

U batteriu hè presente in Corsica, largamente spartu è a situazione vene di fatti gravissima, cun cunsiquenze putinziale propiu trimende nantu à l'arburatura è e filere agricole.

Ci hà dunque da tuccà à dà pettu à una crisi tamanta.

Di pettu à sta situazione, vinaria scuccagnata à di ch'ellu hè troppu tardi pè dassi di manu è ch'ella ùn vale à vulessi prutege. I nostri spizialisti lucali (cunsirvatoriu butanicu, INRA, Università) ma al di là i scintifichi di l'INRA, quelli di u labburatoriu d'Angers, spizialisti di a biulugia mulicularia di u batteriu, ch'è no avemu cunsultatu, sò tutti assulatamente furmali : ci vole invece à rinfurzà à tuttu pattu a prutizione di a nostra isula pè chisià l'intrata d'altre sottuspezie (par indettu quella « fastidiosa », ch'è s'appiccica à a vigne in e Baliare), ancu di più dannifiche è chisià u riaccoppiu di stirporii affaccati da lochi sfarenti è ch'è s'appigliarianu ad altre spezie.

Dunque ch'ellu ùn si parli di vulè calà e bracce.

Cumu dassi di manu oramai ?

- 1) Ci vole à vultà à l'appiigazione stretta di a difesa d'impurtazione di piantine di spezie dette sinsibbule, listinu ch'ellu ci vole à rivisà in cuntinivu.
- 2) Accorre à sicurità senza altru e sole impurtazione ch'è ci hè manera di falla, volesi di e piantine di e vigne (trattamentu termicu).
- 3) Ci tocca à cresce l'aiuti à i virduristi ch'è pruducenu sopra à locu.
- 4) Ci vole à mette in piazza un prugramma di test sistematichi di varietà ch'è pudarianu esse « tullarente » à u batteriu, anzituttu pè l'alivi.
- 5) Avemu da appruntà à a lestra una pruposta di statutu particolare di prutizione di a biudiversità di l'isule arrimbenduci à u mudellu oltrimarinu.

Infine esisgimu da u Statu ch'ellu metti in opera in lu casu ch'è no parlemu u principiu di pricauzione enunziatu da l'articulu 5 di a Cartula di l'ambiente, ch'è quella hà valore custituziunale, senza sottustimà i risichi nè lascià sviluppassi una crisi sanitaria irrivirsibbule, ch'è ne pagariamu e pene di modu cullittivu è ch'è e cunsiquenze nimu hà in tantu i mezi di pudelle misurà.

Vi ringraziu.